

Nilai kerja sektor pembinaan melonjak 9.6 peratus

Nilai kerja sektor pembinaan Malaysia melonjak sebanyak 9.6 peratus tahun ke tahun pada suku ketiga 2023 untuk mencatatkan sejumlah RM33.4 bilion, menurut Jabatan Perangkaan Malaysia.

Ketua Perangkawan, Datuk Seri Mohd Uzir Mahidin, berkata nilai kerja sektor pembinaan terus mengekalkan momentum positif untuk suku keenam berturut-turut (suku kedua 2023: 8.1 peratus).

"Momentum ini dipacu oleh pertumbuhan dua digit dalam subsektor kejuruteraan awam yang meningkat 17.1 peratus (suku kedua 2023: 10.4 peratus) serta peningkatan ketara dalam aktiviti pertukangan khas sebanyak 16.2 peratus (suku kedua 2023: 9.8 peratus)," katanya dalam Statistik Pembinaan Suku Tahunan, Malaysia, Suku Ketiga 2023.

Beliau berkata bangunan kediaman turut menyumbang kepada pertumbuhan dengan merekodkan sebanyak 7.9 peratus (suku kedua 2023: 6.9 peratus).

Pada masa yang sama, subsektor bangunan bukan kediaman mengalami penurunan marginal sebanyak 0.7 peratus berbanding pertumbuhan sebanyak 5.7 peratus pada suku tahun sebelumnya.

Mengulas lanjut, beliau berkata daripada RM33.4 bilion dicatatkan pada suku ketiga 2023, sejumlah RM13.5 bilion atau 40.5 peratus daripada nilai kerja sektor pembinaan adalah dalam kejuruteraan awam.

Peningkatan ini disumbangkan terutama oleh aktiviti pembinaan jalan raya dan landasan kereta api dengan pertambahan sebanyak 22.1 peratus atau berjumlah RM7.4 bilion.

Sementara itu, nilai kerja pembinaan bagi bangunan bukan kediaman dan bangunan kediaman, masing-masing sebanyak RM9.2 bilion (27.5 peratus) dan RM7.3 bilion (21.9 peratus).

Aktiviti pertukangan khas menyumbang RM3.4 bilion (10.0 peratus), terutamanya dalam aktiviti pemasangan sistem paip, pemanasan dan pendingin udara (RM1.1 bilion) serta pemasangan elektrik (RM0.9 bilion), katanya.

Sektor swasta terus menjadi pemacu utama pertumbuhan pada suku ini, dengan peningkatan sebanyak 8.6 peratus (suku kedua 2023: 17.3 peratus), yang disumbangkan oleh aktiviti pertukangan khas (26.5 peratus) dan kejuruteraan awam (10.2 peratus).